



Deklarasaun Bancada Partido Democrático Relasiona ho Veto ba Dekretu
Parlamento Nacional nº 45/III Lei do Investimento Privado

Kaer Metin Ukun Rasik-an no Harii Nasaun husi Bazu

Exceletisimu Sr. Prezidente no Vise Prezidente Parlamento Nacional sira ,
Exceletisimu Ilustres Deputados no deputadas sira

Investimentu husi setor privadu importante tebes ba ita nia rain. Importante
tanba bele tulun setor publiku hodi dinamiza kresimentu ekonomiku iha sorin
ida, no iha sorin seluk hodi fo serbisu barak ba Timor oan sira iha nebe tuir ^{bele} reduz
taxa de desempregu no pobreza iha rai ida ne'e.

Restaurca nia independente
Tinan 16 ona Timor-Leste ukun-an, maibe setor privadu sei fraku tebes tanba
kompainias nasionalis-laiha kapasidade hodi halo investimentu boot nebe bele fo
serbisu barak ba Timor oan sira. Iha sorin seluk kompainias privadas
internasionais barak seidauk halo investimentu barak iha Timor-Leste tanba
problema paz, estabilidade no seguransa. La'os ne'e de'it maibe mos lei de
investimentu privadu nebe agora vigora hela, ladun amigo ba investimentu no la
la atrativu ba investidor sira husi rai li'ur.

Excelencias sira,

Prinsipiu baziku husi ekonomia nian ida mak "laiha matabisu gratis" significa
laiha ema ida mak hakarak/ tama iha negosiu hakarak lakon. Lei nudar
instrumentu ida, alem de paz, estabilidade no seguransa, nudar instrumentu sira
nebe fo konfiansa ba ema estranjeiru sira hodi halo investimentu iha Timor-
Leste. Ohin loron-ita-laiha ona problema ho paz, estabilidade no seguransa tanba

eleisaun presidencial no lejislativas nebe foin liu daudaun hatudu momoos povu Timor-Leste tomak, no forsa politika ho sosial tomak hatudu ona sira nia kompromisu no kontribuisaun ba paz, estabilidade no seguransa. Ita hotu hein ambiente paz, estabilidade no seguransa nebe diak ona ne'e bele kontinua rohan laek ba oin. Kona ba lei de investimentu mak seidauk diak no la atrai investimentu boot sira husi li'ur nian.

Excelencia sira,

Konsiente ba ida ne'e, mak iha uma fukun ida ne'e, ita buka hadia lei de investimentu atual ho aprovasaun ho lei foun ida nebe amigavel tebes ba ema estranjeiru sira hodi halo investimentu iha Timor-Leste. Maski Lei ne'e diak ona, maibe hetan veto husi Sua Excelencia Prezidente da Republika. Prezidente da Republika iha ninia konsiderasaun balun nebe lori nia ba veta lei ida ne'e. Partido Democrático apresia preokupaasaun ho konsiderasaun sira husi Prezidente da Republika nian, tanba ne'e hatudu katak, orgaun sira Estadu nian, hotu-hotu, hakarak halo buat hotu nebe diak liu ba Timor-Leste.

Exceleacias,

Timor-Leste la'os moris mesak iha mundu, maibe iha mos nasaun sira seluk. Rai independente hotu iha interdependensia atu politika ka ekonomikamente ba malun Estadu ho nasaun ida-idak nudar rai independente maibe barak halo parte iha organizasaun sira internasional no rejional. Timor-Leste ohin loron halo parte iha CPLP ho seluk-seluk tan no hakarak tebes sai parte husi organizasaun rejional ASEAN nian. Infelizmente rai sira nebe halo parte iha organizasaun internasional ho rejional sira nebe Timor-Leste halo parte hotu, barak seidauk halo investimentu boot iha Timor-Leste. Iha artigu ida hakerek husi David Freedman, nebe publika husi ADB iha boletin "Pacific Economic Monitor", nia dehan: "Estimula investimentu privadu nudar dezafiu fundamental ida ba Timor-Leste. Investimentu total ba ekonomia (publiku no privadu) aumenta signifkativamente ona desde 2007 tanba forte investimentu fiskal ida husi investimentu publiku maibe investimentu privadu la aumenta signifkativamente

no kontinua ki'ik nafatin bainhira kompara ho rai vizinho sira iha Sudeste Aziatiku no Pasifiku." Hanesan izemplu ita bele kompara investimentu iha rai vizinho sira, iha 2014, Laos ninia investimentu privado reprezenta 22%, Filipinas nian 19% no Timor-Leste nian 8-9% de'it, ki'ik liu iha rejiaun nian.

Exceleacias sira,

Ita hotu hatene katak infraestruturá fizika sira nebe diak sei tulun tebes deslokasaun fasil ema ho bens sira nian iha ita nia rai-laran no hadia serbisu fundamental sira hanesan eletrisidade, importante tebes hodi atraí investimentu estranjeiru sira. Dezenvolvimentu fiziku sira ne'e hahu la'o daudaun maibe nivel formasaun ba kapital umanu no ambiente ekonomiku em jeral kontinua la atraí interesse investidor sira tanba sira seidak haree Timor-Leste sai fatin ba investimentu nebe diak.

Excelencias sira,

Mosu pergunta ida: Tanba sa investimentu privado ki'ik tebes iha Timor-Leste? Ninia resposta iha ona esplikasaun balun nebe hato'o uluk ona katak lei de investimentu nebe aplika ba investimentu privadu importante duni, maibe importante liu tan atu bele aplika lei sira ne'e fator ambiente sosio-ekonomiku em jeral husi ita nia rain nian, no nivel formasaun nebe ho kualidade diak em jeral husi kapital umanu nian ho trabalhador sira nian importante liu. Tanba ema mak garante paz, estabilidade no seguransa, no ema mak hala'o lei no hasaa'e kresimentu ekonomiku no hadia moris ita nia povu no nasaun nian. Faktor ida mak halo Timor-Leste, to'o ohin loron, seidak sai membru plenu ASEAN nian, tanba rai membru balun husi ASEAN nian, sei kontinua duvida ba investimentu privado husi estranjeiru nian nebe kontinua ki'ik iha Timor-Leste.

Ho preokupasaun no esplikasaun sira ne'e hotu, ita to'o iha konkluziun ida hodi halo pergunta seluk: Sera que ita nia lei de investimentu nebe agora sai baze ba debate iha uma fukun ida ne'e, no hetan veto husi Sua Excelencia Prezidente da Republika, bele rezolve dala ida hotu problema hirak nebe ita nia rain hasoru?

Pontu balun nebe sai preokupasaun ka konsiderasaun husi Sua Excelencia Presidente da Republika nian, Bancada Partido Democrático haree ladun forte hodi sai baze hodi justifika veto prezidensial ida. Nune'e mos iha interpretasaun ba ninia legalidade, haree hanesan deficiente hela, atu haree husi lidun juridiku nian ka husi redasaun ho portugues.

Hatan ba pergunta iha leten, bainhira Partido Democrático hatan katak lei de investimentu nebe agora sai diskusaun ne'e bele rezolve buat hotu ona, mak iha ne'e Bancada Democrática sai la onestu ona. Nune'e pergunta nebe merese hetan resposta onesta mak ida ne'e: Sera que lei nebe agora ita diskute hela ne'e diak liu lei anterior? Sera que lei nebe ita diskute daudaun ne'e sai amiga liu ba investimentu? Katak favoravel liu tan hodi aumenta investimentu privado iha ita nia rain? Ninia resposta modesta mak ne'e: Nesesaria maibe seidakuficiente tanba artigu David Freedman nian nebe ami temi iha leten fo hanoin ba ita atu tetu halo oinsa hodi hasae tan investimentu privadu iha rai ida ne'e.

Excelencia sira,

Bancada Partido Democrático afirma pozitivamente ba lei nebe Parlamento Nacional aprova tiha ona hodi hadia lei anterior nebe ladun amigo ba investimentu privado sira. Nune'e Bancada Partido Democrático afirma no reafirma ninia pozisaun hodi fo voto favoravel ba re-aprovasaun ba PPL nº 45/III/(4ª) - Lei do Investimento Privado.

Bancada Partido Democrático favoravel ba re-aprovasaun ba Lei ida ne'e tanba:

Ida, PPL nº 45/III/ (4ª) kontribui ho forma notoria ba integrasaun Timor-Leste nian iha ASEAN tanba foin primeira vez, preve, tuir ditames ASEAN nian, komunikasaun no estabesimentu "lista negativa de investimentu" ida nebe vedada ba investidor estranjeiru sira. Nune'e mos foin primeira vez, halakon tiha nesiedade ba investidor estranjeiru nebe presiza halo pagamentu ba Ajensia Espesializada de Investimentu bainhira hahu projetu. Iha parte seluk, alarga tan rekursu ba arbitrajen internasional husi parte investidor estranjeiru

sira no permite ba livre apresiasaun husi Governo, fo possibilidade hodi halo rekursu ba forma alternativa sira hodi rezolve litigios ba investidor nasionais, nebe mos vedada iha lei ida uluk.

Rua, fim ba emisaun sertifikadu husi investidor no respetiva taxa de tramitasaun ne'e rasik, no nudar konsekuensia em termos de regulamentasaun ba lei, halakon Comissão de Avaliação do Investimento Privado. Ne'e signifika, lei ne'e rasik hatan ba solisitasaun investidor sira nian no buka reduz intervensaun Estado nian iha vida empreza investidora sira iha parte ida no iha parte seluk, iha mos efeito pozitivu hodi reduz korrupsaun no kria ambiente ida amigo liu tan ba investimentu privado.

Tolu, revogasaun ba lei anterior relasiona ho definisaun zona sira paiz nian ho direitu ba benefisiu espesial sira nebe permite ona halo lakon injustisa evidente ida iha lei anterior relasiona ho Baucau. De faktu, iha istoria sira tinan hirak ikus nian, em termos de dezenvolvimentu rejional, rekuinese katak, halo sekundarizasaun ba Munisipiu Baucau em relasaun ho Munisipiu Dili. So ho evidente "distracão" ida mak sei bele kompara nivel de dezenvolvimentu atual Baucau nian ho Dili;

Hat, benefisius fiscais. Iha Lei de Investimento foun ne'e, oinseluk ho ida anterior tanba investidor sira hetan garantia ba konsesaun ba numeru de visto pessoal tekniku sira nebe razoavel relasiona ho sira nia nesidade sira hodi halo implementasaun ba projetos de investimento sira, liuliu iha faze prospeksaun no konstrusaun maibe mos iha faze operasaun. Alem de vantajen sira ne'e, konsesaun husi benefisiu sira ne'e la sujeita ba montante minimos (nebe aas) estabelesidu iha Lei, maibe dependente de'it ba regulamentasaun Governu nian. Iha ne'e introduz factor flexibilidade ida nebe bele sai importante ba investidor sira;

Lima, iha lei foun kona-ba Zonas Industriais Especiais nebe sei iha hela estudo husi Ministerio do Planeamento e Investimento Estrategico, buat nebe halo mos rai seluk, sai hanesan instrumento poderozu nebe dada atrasaun investidor sira nian, atu nasionais ka internasionais;

Neen, iha PPL n.º 45, kona-ba benefisiu fiskais. Benefisiu fiskais ne'e sei fo de'it ba setor sira nebe direktamente produtivu hanesam agrikultura, peska, industria transformadora sira no turizmu, la'os fo ba setor hotu-hotu, inkluidu sira nebe ninia rentabilidade potencial nebe la nesesita apoiu ruma husi Estado liu husi forma husi "desconto" fiskais.

Hitu, Bancada Partido Democrático fiar katak, bainhira la halo leitura ida ho kuidadu kona-ba lei foun ne'e, nune'e mos halo komparasaun ida lais ho lei ida uluk, mak bele konklui katak alterasaun sira nebe halo iha uma fukun ida ne'e la significante. Labele haree ba alterasaun nebe halo ba lei anterior ne'e significante ka lae mak sai nudar kriteriu iha asaun politika ida, maibe tenki haree ba aplikasaun iha lei ne'e eficiente, efikaz no atrativu ka lae. Bancada Partido Democrático haree katak PPL n.º 45 ne'e atrativu tanba nia amigavel ba investimentu.

Excelencias sira,

Bancada Partido Democrática hakotu nia deklarasaun hodi fo hantun hikas katak, sei vota favoravelmente ba re-aprovasaun PPL n.º 45/III/(4^a). Ami fiar katak lei ida ne'e necessaria maibe sei dauk suficiente hodi aumenta significativamente investimentu privado iha Timor-Leste. Maski nune'e, lei ida ne'e diak liu lei ida uluk tanba nia kria ona ambiente ida amigo ba investimentu no oferese facilidades barak liu tan ba investidor estranjeiru sira. Agora, preçisa halo no hadia tan aspektu sira seluk, hanesan hadia kapital umanu no hadia ambiente ekonomiku-sosial jeral Timor-Leste nian.

Obrigada.

Jacinta Pereira

Deputada Bancada Partido Democrático

Dili, 7 de Agosto de 2017